

Særskild eksamen

Ein elev som får karakteren 1 i standpunktkarakter i eit fag, har rett til særskild eksamen i faget dersom han eller ho ikkje er trekt ut til eksamen i faget. Det gjeld òg for fag der det ikkje blir halde eksamen ordinært.

Særskild eksamen blir normalt halden samtidig med utsett og ny eksamen.

Ny eksamen

Ein elev som får karakteren 1 ved ordinær eksamen, har rett til ny eksamen i faget ved første etterfølgjande eksamen. Eleven beheld då standpunktkarakteren i faget.

Dersom eleven ikkje går opp til første etterfølgjande eksamen, må han eller ho ta faget som privatist, og standpunktvurderinga i faget fell bort.

Utsett eksamen

Ein elev eller privatist som har dokumentert fråvær ved ordinær eksamen og særskild eksamen, eller ein elev som har dokumentert fråvær ved ny eksamen, har rett til å framstille seg til første etterfølgjande eksamen. Eleven beheld standpunktkarakteren i faget.

Dersom eleven ikkje går opp til første etterfølgjande eksamen, må han eller ho ta faget som privatist, og eventuell standpunktvurdering i faget fell bort.

Fråvær frå eksamen blir rekna som dokumentert når eleven eller privatisten er hindra frå å møte til eksamen, hindringa er uføreseieleg og han eller ho elles ikkje kan lastast for hindringa. Eleven eller privatisten må leggje fram dokumentasjon på dette.

Dersom ein elev har rett til utsett eksamen i trekkfag, skal trekkinga av fag gjerast på ny.

Ikkje gitt standpunktvurdering og uttrekk til eksamen

Ein elev har klagerett dersom han eller ho ikkje får standpunktvurdering (IV) i eit fag. Standpunktkarakterane blir vanlegvis sette etter skriftleg eksamen. Dersom ein elev er trekt ut til eksamen i faget, må eleven bestemme seg for om han eller ho vil gå opp til eksamen.

Eleven har klagerett på vedtaket om at det ikkje blir gitt standpunktvurdering. Dersom han eller ho klagar og får medhald i klagen, skal eksamenskarakteren stå på vitnemålet. Dersom eleven ikkje klagar, eller eleven ikkje får medhald, skal eksamen annullerast.

Ikkje bestått standpunktvurdering og eksamen

Dersom ein elev får karakteren 1 i standpunktvurdering, men får bestått karakter til eksamen, er faget bestått.